



**ЎЗБЕКИСТОН ИҚТИСОДИЁТ АССАМБЛЕЯСИ
ва
ТОШКЕНТ ШАҲРИДАГИ АДЖУ УНИВЕРСИТЕТИ
ўртасида**

**кадрларни тайёрлаш соҳасида
ҳамкорлик тўғрисидаги**

АНГЛАШУВ МЕМОРАНДУМИ

Ўзбекистон Иқтисодиёт Ассамблеяси (бундан кейин – “Ассамблея”) номидан Бошқарув раиси Умаров Мухтор Мансурхожаевич, ва

Тошкент шаҳридаги Аджу университети (бундан кейин – “Университет”) номидан Университет ректори Муратов Гайрат Азатович, биргаликда “Томонлар” деб аталувчилар,

олий таълим, илм-фан ва ишлаб чиқариш узвийлиги ҳамда узлуксизлиги тамойили, шунингдек, жаҳон таълими ва илмий ҳамжамиятига интеграциялаш асосида ривожлантиришни кўзлаб;

таълим ва ишлаб чиқариш ҳамкорлиги орқали фан, техника ва технология ютуқларидан самарали фойдаланиш, бозор иқтисодиёти муҳитида таълим ва ишлаб чиқаришни рақобатбардошлигини ошириш мақсадида кадрлар тайёрлашнинг замонавий ва мукамал тизимини жорий қилиш заруриятини инобатга олиб;

халқаро таълим стандартлари асосида тайёрланган, юксак касбий билим ва маҳоратни эгаллаган, ижодкор, ташаббускор ва мустақил қарор қабул қилиш қобилиятига эга, стратегик фикрловчи ва салоҳиятли кадрларнинг янги авлодини шакллантириш мақсадида;

бозор иқтисодиёти шароитида мустақил равишда фаолият олиб бориш маҳоратига эга бўлган, истиқболли лойиҳа ва вазифаларни илгари суриш, ҳамда ҳал этишга қодир тадбиркорлик субъектларини янги авлодини шакллантиришга кўмаклашиш мақсадида

қуйидагилар тўғрисида келишиб олдилар:

1. ҲАМКОРЛИК МАҚСАДИ

Томонлар ушбу Англашув Меморандуми ўзаро ҳамкорликнинг умумий тамойилларини ўз ичига олганлигини чуқур англаган ҳолда, унинг қоидалари ҳамда амалдаги қонунчилик, соҳага оид давлат дастурлари ва ўз уставларига амал қилиб, ўзларининг ваколатлари доирасида ўзаро ҳурмат асосида кадрларни тайёрлаш соҳасида икки томонлама манфаатли ҳамкорликни қўллаб қувватлайдилар ва ривожлантирадилар.

2. ҲАМКОРЛИК СОҲАЛАРИ

Томонлар, кўзланган мақсадга эришиш йўлида қуйидаги соҳаларда ҳамкорликни қўллаб-қувватлайдилар ва илгари сурадилар:

➤ умумий манфаатга доир масалалар юзасидан маълумотлар, тажриба ва амалиёт алмашиш;

➤ “Университет”нинг ўқув жараёнига илғор технологиялар, фан ва техниканинг энг янги ютуқларини жорий этишга кўмаклашиш;

➤ “Ассамблея” кўмагида архитектура, қурилиш, электротехника ва компьютер муҳандислиги соҳаларида истиқболда кадрлар тайёрлашга буюртмаларини шакллантиришга кўмаклашиш;

➤ “Ассамблея”нинг “INVEST HUB” миллий инвестиция маркази билан ҳамкорликда инвестиция лойиҳалари ва потециал инвесторларни жалб қилиш соҳасида кенг қамровли алоқаларни йўлга қўйиш;

➤ “Университетда” Аджу Университети (Корея Республикаси) билан келишилган ҳолда халқаро стандартлар, замонавий, мутлақо янги талаблар асосида бизнес-инкубатор ташкил қилишни ўзаро ҳамкорликда амалга ошириш;

➤ профессор-ўқитувчилар, иқтидорли талабаларнинг илмий-тадқиқот салоҳияти ва фаолиятдан унумли фойдаланган ҳолда “Ассамблея” томонидан ўтказиладиган тадбирларга жалб қилиш;

➤ “Ассамблея” томонидан ҳомийлик асосида “Университет”ни қурилиш ва архитектура лойиҳалари намуналари ва ўқув-методик адабиётлар билан таъминлаш;

➤ таълим, илм-фан ва ишлаб чиқариш ўртасида интеграцияни чуқурлаштириш учун ҳамкорликда илмий мақолалар тайёрлаш ва уларни нашр қилиш, конференциялар, симпозиумлар, семинарлар, маҳорат дарслари, воркшоплар ва бошқа турдаги тадбирларни ўтказиш;

➤ Томонлар ўзаро келишган ҳамкорликнинг бошқа соҳалари.

3. ҲАМКОРЛИКНИНГ АМАЛГА ОШИРИЛИШИ

Томонлар мазкур Меморандумнинг 2-қисмида назарда тутилган ҳамкорликларни амалга оширишда ҳар бир ҳамкорлик предмети тафсилотларини алоҳида ахдлашувлар орқали амалга оширадилар.

Томонлар ўзаро келишувига биноан ушбу Меморандум мақсадлари учун бошқа шерикларни, ҳамкорларни жалб қилишлари мумкин.

4. ИНТЕЛЛЕКТУАЛ МУЛК ҲУҚУҚЛАРИ ҲИМОЯСИ

Интеллектуал мулк ҳуқуқлари ҳимояси амалдаги қонунчилик ҳамда Томонлар иштирокчиси ҳисобланган халқаро битимларга мувофиқ ҳолда амалга оширилади.

Томонлардан бирининг товар номи, фирма белгиси ва/ёки расмий эмблемасидан иккинчи Томон тарафидан нашр, ҳужжат ва/ёки бошқа усулларда фойдаланиш, биринчи Томоннинг ёзма рухсатисиз таъқиқланади.

Маҳсулот, кашфиёт/ихтиро Томонларнинг биргаликдаги фаолияти ёки Томонларнинг ўзаро ҳамкорликда амалга оширилган тадқиқотлар натижасида яратилган бўлса, ўзаро келишувга мувофиқ ҳар иккала Томонга тегишли ҳисобланади.

Томонлардан бирининг яқка фаолияти ёхуд амалга оширган тадқиқотлари натижасида яратилган маҳсулот, кашфиёт/ихтиро фақат ўша Томонга тегишли ҳисобланади.

5. МАХФИЙЛИК

Ушбу Меморандум ёки унга мувофиқ тузилган бошқа келишувларнинг бажарилиши вақтида ҳар бир Томон бошқа Томонга тақдим этган ёки ундан қабул қилган ҳужжат, ахборот ва/ёки бошқа маълумотларнинг махфийлигига, тижорат сири талабларига риоя қилиш мажбуриятини олади.

Ҳар бир Томон ҳужжат, ахборот ёки бошқа маълумотларни бундай ҳужжат, ахборот ёки бошқа маълумотларни тақдим қилган Томоннинг ёзма рухсатисиз учинчи Томонга ошкор қилмайди ва тақдим этмайди.

Ушбу Меморандум ўз кучини йўқотишидан қатъий назар Томонлар мазкур модда қоидалари амалда бўлиши тўғрисида келишиб олдилар.

Юқорида келтириб ўтилган талабларга қарамай ҳар бир Томон ушбу маълумотларга муҳтож бўлган юқори даражадаги раҳбарият, менежмент, ходимлар, ишончли шахслар, вакиллар, маслаҳатчиларга махфий ёки тижорат сири бўлган маълумотларни ошкор қилиши мумкин. Бундай ҳолларда ушбу маълумотларни ошкор қилиш, шунингдек унинг оқибатлари учун жавобгарликни ушбу маълумотларга эга бўлган шахслар ўз зиммасига оладилар.

6. МАСЛАҲАТЛАШУВ

Томонлар ушбу Меморандумни қўллаш юзасидан ўзаро келишилган вақтларда маслаҳатлашувлар ўтказадилар.

Томонлар мазкур Меморандум мақсади ва унда белгиланган вазифаларни ўз томонларидан амалга оширилишига бевосита масъул жавобгар бўлган шахс/шахсларни белгилайдилар.

7. ЎЗГАРТИРИШ ВА ҚЎШИМЧАЛАР

Ҳар бир Томон ушбу Меморандумга ёхуд унинг бир қисмига ўзгартириш ёки қўшимча киритишни ёзма равишда таклиф этиши мумкин.

Томонлар ўзаро келишган ҳар қандай ўзгартириш ва қўшимчалар ёзма равишда ушбу Меморандумнинг ажралмас қисми ҳисобланадиган баённомалар шаклида расмийлаштирилади ва имзоланган кундан бошлаб кучга киради. Киритилган ўзгартириш ва қўшимчалар кучга кирган санадан бошлаб юзага келадиган ҳуқуқий муносабатларни тартибга солади.

Ҳар қандай ўзгартириш ва қўшимчалар уларнинг кучга киргунига қадар ушбу Меморандумдан келиб чиққан ёки унга асосланган Томонларнинг ҳуқуқ ва мажбуриятларига таъсир этмаслиги лозим.

8. ЖАВОБГАРЛИК

Ҳеч бир Томон ушбу Меморандум асосида ёки унга боғлиқ равишда бошқа Томон олдида олинмаган фойда, йўқотилган обрў, шартномани бекор қилиш, ишбилармонлик имкониятини йўқотиш ёки тадбиркорлик фаолиятини тўхтатиш/тугатиш, бошқа Томонга билвосита келиб чиқадиган махсус ёки ғайри оддий йўқотишлар ёхуд зарар, шунингдек юзага келиши мумкин бўлган бошқа салбий ҳолатлар учун жавобгар бўлмайди.

9. НИЗОЛАРНИ ҲАЛ ҚИЛИШ

Ушбу Меморандум қоидаларини талқин қилиш, бажариш ва қўллашда Томонлар ўртасида вужудга келадиган ҳар қандай келишмовчилик ёки низолар учинчи томонга ёхуд судларга мурожаат этмасдан, Томонлар ўртасида маслаҳатлашувлар ва/ёки ёзма шаклидаги музокаралар йўли билан дўстона равишда ҳамжиҳатлик асосида ҳал қилинади.

10. ҲАМКОРЛИКНИНГ КУЧГА КИРИШИ, АМАЛ ҚИЛИШИ ВА ЎЗ КУЧИНИ ЙЎҚОТИШИ

Ушбу Меморандум имзоланган кундан бошлаб кучга киради.


Мазкур Меморандум томонларнинг ёзма келишувига мувофиқ тугатилади.

Ушбу Меморандумнинг тугатилиши, унинг амал қилиши ўз ниҳоясига етиши санасидан аввалроқ келиб чиққан ёки унга асосланган Томонларнинг ҳуқуқ ва мажбуриятларига таъсир этмаслиги лозим.

Мазкур Меморандум 2 (икки) асл нусхада, ҳар иккиси ҳам ўзбек тилида тузилди.

11. ТОМОНЛАРНИНГ ИМЗОЛАРИ


**Ўзбекистон Иқтисодиёт
Ассамблеяси бошқарув раиси**



Умаров Мухтор Мансурхожаевич



**Тошкент шаҳри
Аджу Университети ректори**



Муратов Гайрат Азатович



2022 йил “.....” январ